

SOPELA. Musika banda mitikoak eginiko hainbat film ikusiko dira

Beatles taldearen omenez hainbat ekitaldi eratu dabe

Gaur erakusketea inaugurauko dabe horren ganean, kultur etxean



EGUNKARIA

Beatles taldeko jarraitzaileek banda mitikoagaz loturiko hainbat ekitaldiz gozetako erea eukiko dabe.

Veronica Muñoz |

Sopelako Udaleko Kultur, Hezkuntza eta Gazteria Sailak ahal legin handia egin dau azken hile honeetan, Beatles talde mitikoari omenaldia eskaini guran. Prestaturiko egitarauaren barruan, datozen hiru hileotan, berbaldiak, kontzertuak, proiektzioak eta erakusketea be egongo dira.

Ekitaldiak gaur bertan hasiko dira, musikari ospetsuen ganeko erakusketearen inaugurazinoagaz. Horren bidez, ardura-dunen berbetan, «aukerea emon gura deutsegu herritarrei,

sasoi hartako bizipenak gogortzeko eta estilo barri baten sortzaileak izan ziran musikariak be gogora ekarteko», azaldu dau Imanol Garai Kultur zinegotziak.

Erakusketa nahiko bitxia gertau dabe egitarauaren ardura-dunek. Sopelako Kultur Etxean egongo da zabalik, eta Beatles taldeko ospea pil-pilean egon zan sasoi hainbat gauza ikusi ahal izango dira bertan, nostalgikoen gozamenerako. Argazkiak, disko zaharrak, giltzariak, kamisetak...

Gaur bertan hainbat pelikula eta erreportajeren proiektzioak

be hasiko dira. Kultur Etxeko areto nagusian emongo dabez. Arrastion, esaterako, *A hard day's night* izeneko filma ikusi ahal izango da, 19:30ean.

Pelikulak eta erreportajeak

Urtarrila osoan izango dira proiektzioak, hilearen 15ean, 24an eta 29an: *The Beattles, mundua aldatu eban mitoa, Help* eta *The Beattles at the Sea Stadium* emongo dabez, hurrenez hurren. Amaitzeko, egitaraua oraindino zehaztu bako berbaldiakaz eta kontzertuakaz osotuko dabe. Ekitaldi guztietarako sarrerea doan izango da.

LABURREAN

GETXO

Euskal musikearen ganeko 'Kantuketan' erakusketa interaktiboa gaur goizean inaugurauko dabe, Algortan

Euskera Zerbitzuak Algortara ekarri dau *Kantuketan* euskal musikearen ganeko erakusketa interaktiboa eta gaur goizean inaugurauko dabe. Urtarrilaren 26a arte bisitatu ahal izango da, egunero. Euskal Herrian historian eginiko musikearen lekuko izateko aukerea eukiko dabe herrikoek. Sarrerea doan izango da. Horrezaz ganera, erakusketeagaz batera beste hainbat ekitaldi eratu dabe, horreek guztiok euskal musikeagaz lotuta. Berbaldiak eta kontzertuak egongo dira, hain zuzen be. Gaurko, esaterako, gau teknoa prestatu dabe. Areetako metroko plazan izango da, iluntzeko 20:00etan, eta bertan Selekta Kolektiboak eta Psycos eta Huracan DJ-ek joko dabe.

GETXO

Zaharren egoitza atontzeko beharrak

Datorren hilean amaituko dabe Getxoko Udaleko zaharren egoitza atontzeko proiektuaren bigarren zatia. Beharren aurrekontu osoa hiru milioi eurokoa da, eta bost zatitan bananduta dago. Joan dan urteko garagarrian lehenengoa amaitu eben. Proiektuaren bidez traba arkitektonikoak kenduko dabez, eta eraikin osoan egingo dabez kontontzeko lanak, besteak beste.

GETXO

Tresna barriak, laguntza programetarako

400 pertsonak erabili eben igaz etxean laguntza jaso ahal izateko zerbitzua. Laguntza hori, hain zuzen be, Lagunduz programearen bidez emoten dabe. Horren premia izan eben pertsonen artean, batez be adineko jentea dago. Horreei guztiei emoten jaken laguntza hobetu guran, ganera, orain gitxi Udalak 6.000 euro erabili dauz hainbat tresna erosteko, tartean gurgil-aulki batzuk.

BERANGO

Elikagaiak batzen dabilz egunokaz, Saharan, Tindufeko kanpamenduetan bizi diranei bialtzeko

Iraupen luzeko elikagaiak batzen dabilz egunokaz Berangoko udaletxean, batutako janari guztia Saharako kanpamenduetara bialtzeko helburuagaz. Kanpaina horren barruan, beren beregi, arroza, lekaleak, pastea, azukrea eta atuna batu gura dabez, Tindufeko kanpamenduetan orain dala 25 urtetik sano egoera txarrean bizi diran errefuxiauentzat. Lagundu gura daben herritarrek udaletxera eroan ahal izango dabez elikagaiak, urtarrilaren 28ra bitartean. Horretarako ezarri daben ordutegia ondorengo da: astegunero, goizeko 9:00etatik 13:00etara izango da; zapatuetan, barriz, 9:00etatik 12:00etara bitartean.

LARRABETZU. Alkateak arazoaren inguruan erakutsitako jarrera salatu dabe

Herrian bertan 0 eta 2 urte arteko umeentzako ikasgelak zabaldu daiezan aldarrikatu dabe

V.M. |

Larrabetzuko gurasoen talde batek gutun baten bidez jakin arazo dauenez, 0 eta 2 urte arteko umeentzako ikasgelak herrian bertan zabaltzeko aldarrikatzen dabilz. Izan be, herrian jaiotze tasa azken urteotan nahiko altua izan arren, ume txikiak ez daukie herrian ikasteko aukerarik.

Larrabetzuk gaur egun 1.500 biztanle daukaz. Gurasoen taldeak azaldukoaren arabera, Euskal Autonomia Erkidegoan haurtzaindegiak arautzen dauzan dekretua kontuan hartu ez-

kero, herrian 0 eta 1 urte arteko umeentzako 3 ikasgela egon beharko litzateke, eta beste bi, 1 eta 2 urtekoentzat. Halanda be, bat be ez dago.

Horregaitik, gurasoek kotxea erabili behar dabe euren seme-alabak inguruko herrietako eskoletara eramateko, Zornotzara, Galdakaora, Basaurira, Mungia eta Bilbora, besteak beste.

Arazo horri urtenbidea topau guran, Larrabetzuko Eskolako Gurasoen Alkartearen eta Eskolako Kontseiluaren eritzia eskatu eben. Ostean, inguruetako udalerrietako egoeraren ganeko informazioa batu eben, eta

gero Udalgaz berba egitea izan zan hurrengo pausoa. Hemen, Tomas Ordeñana alkateak gai horren inguruan erakutsitako jarrera salatzen dabe. Izan be, esaten dabenaren arabera, proposatutako guztiari beti ezetz erantzuteko joerea erakutsi dau alkateak

Gurasoen talde honen ustez, Larrabetzun badago non ipini ikasgelak, baita umeak, ilusinoak eta zehazturiko prozedurak, diru laguntzak, araudiak eta enparauak be. Beraz, ez dabe ulertzen agintarien jarrera ezkorra, eta arazoa konpondu daien eskatzen dabe.

AGENDA

GETXO

Berto saioa: Galder Bilbao, Unai Angulo, Oier Azula eta Juanjo Respaldiza bertsolari gazteak ariko dira gaur, Algortako Viejo Cafe tabernan. Saioa iluntzeko 20:00etan hasiko da, eta Txapel Bete Berto ekimenaren barruan antolatutako lehenengoa da. Sarrerea doan izango da. Ekimen horren bidez, hain zuzen be, Bizkai osoko bertsolari gazteek kantetako aukerea euki daien lortu gura dabe. Holan, gitxienez hilero saio bat egin gura dabe, Bizkaiko herrietako taberna baten. Urtarrilean eta zezeilan, danetara, 28 saio egingo dabez.

Kontularien Kluba: Istorioak kontau eta entzun gura dabezan helduak gaur batuko dira, hilero egiten daben moduan, Algortako kultur etxeko areto nagusian. Ekitaldia arrastiko 19:30ean hasiko da. Istorioak kontetako, aldeaz aurretik emon

behar da izena, liburutegian. Horreek entzun gura daben guztiek, barriz, aretora joan besterik ez dabe egin behar.

Antzerkia: Joaquín Kremel eta Julia Torres aktore ezagunek *Un marido de ida y vuelta*, Poncelak idatzirik beharrean oinarritutako antzezlan agertuko dabe gaur, Algortako Getxo antzokian. Saio bi izango dira: arrastiko 19:30ean, lehenengoa, eta gaueko 22:30ean, bigarrena. Sarrerren prezioa 11 eurokoa da, 8,5 euro gazte txartelagaz eta erretirauentzat.

LEIOA

Umeak zaintzeko euskaldunak: Leioako Udaleko Euskera Zerbitzua zerrenda osotzen dabil egunokaz, umeak zaintzeko prest dagozan pertsona euskaldunakaz. Izan be, herrian horreen premia daukien jente asko dago, eta horregaitik zerrenda egitea erabagi dabe. Informazio gehiagorako: 94 400 80 44.